

## **Izveštaj sa 23. sjednice Općinskog vijeća**

30. oktobra 2014. godine u sali Općine Ilijaš održana je 23. sjednica Općinskog vijeća. Nakon vijećničkih pitanja i inicijativa prešlo se na dnevni red planiran za ovu sjednicu.

Na trećoj tački vijećnicima je predložen Zaključak o ponovnom vraćanju tačke na dnevni red prije isteka roka od šest mjeseci - Prijedlog Odluke o davanju saglasnosti za zaključenje Ugovora o korištenju Gradskog nogometnog stadiona u Ilijašu koji je razmatran i nije dobio potrebnu većinu na 20. sjednici Općinskog vijeća Ilijaš koja je održana 26.06.2014. godine, da se ponovo stavi na dnevni red za sjednicu Općinskog vijeća Ilijaš koja će se održati u mjesecu novembru 2014.godine.

**Odluku o pristupanju izradi Regulacionog plana "Alića gaj" donijelo je Općinsko vijeće Ilijaš na sjednici održanoj 31.10.2013. godine. Cilj izrade Plana je urbano uređenje ovog pretežno neizgrađenog prostora koje će lokalnom stanovništvu omogućiti kvalitetniji život, i obezbijediti opremanje saobraćajnom, komunalnom i društvenom infrastrukturom.**

**Na današnjoj sjednici potrebnu većinu dobio je prijedlog Odluke o usvajanju Regulacionog plana "Alića gaj" kao i prijedlog Odluke o provođenju Regulacionog plana "Alića gaj". Ovom Odlukom utvrđuju se uslovi korišćenja, izgradnje, uređenja i zaštite prostora i način provođenja Regulacionog plana "Alića gaj", a naročito granice prostorne cjeline, urbanističko-tehnički uslovi za izgradnju građevina, uslovi za uređenje građevinskog zemljišta, uređenje zelenih i slobodnih površina, te odnosi prema postojećim objektima. U sklopu obuhvata ovog Plana definisane su zone sa sljedećim namjenama:**

- **Zona individualnog stanovanja**
- **Zona kolektivnog stanovanja**
- **Stambeno-poslovna zona**
- **Zona sporta, rekreacije i zelenila**
- **Zona saobraćajne infrastrukture.**

Pozitivno mišljene vijećnika Općinskog vijeća dobila je Šumskoprivredna osnova za ŠPP „Gornjebosansko“-dio.

Jednoglasno je usvojen i prijedlog Odluke o neposrednoj pogodbi za prodaju neizgrađenog građevinskog zemljišta, k.č.br. 265/9 po kulturi njiva u površini od 775 m<sup>2</sup> i k.č.br. 265/10 po kulturi njiva u površini od 896 m<sup>2</sup> sve upisane u državno vlasništvo sa upisanim nosiocem prava raspolaganja u korist Općine Ilijaš. Prodaja će se vršiti neposrednom pogodbom neizgrađenog građevinskog zemljišta u državnom vlasništvu za izgradnju poslovnih prostora P-30, P-29 koji se nalaze u obuhvatu Industrijske zone "Luka" u Ilijašu. Naknada na ime neizgrađenog građevinskog zemljišta utvrđena je u iznosu od 25,00 KM/1m<sup>2</sup> zemljišta.

Razrješen je dužnosti člana, a time i zamjenika predsjednika Komisije za prostorno uređenje, stambeno-komunalne poslove i ekologiju Armin Matoruga, predstavnik Bosanskohercegovačke patriotske stranke – Sefer Halilović, i na ovo mjesto imenovan je Mirzet Ličina, predstavnik Bosanskohercegovačke patriotske stranke – Sefer Halilović.

Razrješen je dužnosti član Komisije za boračka pitanja Jasmin Kurdija, predstavnik Bosanskohercegovačke patriotske stranke – Sefer Halilović, te je na ovo mjesto imenovan Rusmir Alikadić, predstavnik Bosanskohercegovačke patriotske stranke – Sefer Halilović. Za člana Komisije za mlade i obrazovanje izabrana je Melisa Korjenić, predstavnik Stranke za Srednje.

Na 9 tački naša se prijedlog Zaključka kojim se utvrđuje javni interes za Općinu Ilijaš izgradnja kompleksa proizvodnih objekata farme za tov pilića. Općinski načelnik je dao

pojašnjenje vijećnicima vezano za ovu tačku: "Firma "Tref" d.o.o. Visoko obratila se, Općini Ilijaš, sa pismom namjere, za izgradnju kompleksa objekata farme za tov pilića čiji kapacitet u prvoj fazi izgradnje bi se sastojao od dva objekta ukupnog kapaciteta 100 000 komada / turnusu. Investitor planira, ukoliko krene sa realizacijom namjeravane izgradnje, proširiti farmu do broja od ukupno šest proizvodnih objekata, a u narednom periodu izgraditi i proizvodnu halu za preradu mesa. Objekte prve faze bi gradio u Ljubnićima. Gabariti objekata bi bili (80,0x25,0)m, spratnosti P+Pt. Lociranje objekta je planirano na neizgrađenom lokalitetu, izvan urbanog naselja.

Lokalitet na kojem se traži izgradnja je u obuhvatu Prostornog plana Kantona Sarajevo za period 2003-2023.godine u zoni šume i šumskog zemljišta, dijelom na uslovno-stabilnom terenu. Zavod za planiranje razvoja kantona Sarajevo je mišljenja da zahtjev treba rješavati kroz izradu Urbanističkog projekta u skladu sa odredbama Zakona o prostornom uređenju ("Sl.novine Kantona Sarajevo" br. 7/05), po predhodno utvrđenom interesu općine za izgradnju predmetnog kompleksa. Nakon razgovora s potencijalnim investitorom, ukoliko Zaključak dobije potrebnu većinu investitor će pristupiti izradi Urbanističkog projekta, a po tome pokretanju procedure za građevinsku dozvolu" rekao je Općinski načelnik.

I ovaj Zaključak je dobio potrebnu većinu.

Na 23 sjednici Općinskog vijeća usvojena su i pojedina rješenja iz imovinsko-pravne oblasti kao i Informacija o uspjehu i odgoju učenika u osnovnim i srednjim školama, na području Općine Ilijaš primljena je k znanju.